

Directiva di Comité
Olimpico Arubano
(COA).



Wanda Broeksema y Glenda Croes-Tromp

COA ta haya dos miembro nobo

ORANJESTAD - Durante e Asamblea General di Comité Olimpico Arubano (COA) cu a tuma luga siman pasa. Dos candidato nobo a wordo proponi pa federacionnan pa forma parti di e directiva di COA, mirando cu tabata tin dos luga habri. E dos personanan aki sigur no ta desconoci den e mundo deportivo y comercial na Aruba. Ta trata aki di Wanda Broeksema y Glenda Croes-Tromp. Durante di un splicacion duna na e federacionnan presente, Nicole Hoevertsz a splica cu COA mester cuminsa bay traha pa fortifica e "producto" Comité Olimpico Arubano pa asina genera mas fondo y pa

crea mas apoyo pa deporte en general. Mirando e preparacion di Broeksema den e area di marketing y e diferente funcionnan cu el a sa di ocupa cu hopi exito, e lo ta un bon ayudo, den sentido general, pero particularmente den e parti di mercadeo pa e organisacion. Broeksema a wordo proponi pa ta encarga cu e funcion di vice-presidente di COA. Di otro banda, Croes-Tromp ta un persona masha activo den e mundo deportivo di Aruba, cu amplio experiencia den organisacion deportivo. E ta un persona clave den e deporte di triathlon, ta ocupa un funcion

clave den e directiva di e federacion y awor e lo ocupa e funcion como Comisario den e directiva di COA. Despues di a presenta e dos candidaturanan, Asamblea a eligi nan unanime, loke a wordo ricibi cu un fuerte aplauso. COA ta masha orguyoso di por a haya dos persona asina prominente pa forma parti di e directiva actual. Un aspecto sigur remarcabel ta e hecho cu directiva di Comité Olimpico Arubano awor ta consisti di seis hende muhe y tres hende homber! COA ta desea nan hopi exito den nan posicion y funcion nobo. □

Presidente di COA,
Roy Mezas

Na e di ocho conferencia mundial di Deporte, Educacion y Cultura



Roy Mezas, Presidente di Comité Olimpico Arubano.

ORANJESTAD - Recientemente Comité Olimpico Internacional, den cooperacion cu e "United Nations Educational, Scientific and Cultural Organisation (UNESCO)", a organisa e di ocho conferencia mundial riba deporte, educacion y cultura cu a ser teni na Amsterdam, Hulanda. Mas cu 500 miembro di Comité Olimpico Nacional, Federacionnan Internacionales, Comité Organizado pa Weganan Olimpico, institucionnan educacional y cultural, Nacionnan Uni, organisacionnan gubernamental y no-gubernamental a participa na e conferencia aki. Aruba a ser representa pa Su Excelencia Minister di Salubridad y Deporte, Dr. Richard Visser

y Presidente di Comité Olimpico Arubano (COA), Roy Mezas. Bou di e tema "Olympism Powered by Youth", diferente sesion a ser teni, como tambe presentacionnan a ser haci den grupo, algun di nan dialogonan specialisa. Puntonan sumamente importante a bini padilanti, manera e importancia di e rol di "entourage" (esta e ekipo di specialistanan cu ta acompaña un atleta den full su proceso di preparacion), IOC y e Movimiento Olimpico, como tambe e Movimiento Olimpico hunto cu e sistema di Nacionnan Uni y e sociedad civil. **ROL DI ENTOURAGE** E rol di "entourage" y educador (e famia di

e atleta, su coach y entrenador, e staf tecnico, su manager of agente, manera defini dor di IOC) ta critico den e dispensacion di e balornan olimpico na e hobennan participando den tur deporte. Ta necesario pa esunnan cu ta constitui e "entourage" comprende kico e balornan Olimpico ta representa, pa nan mes kere den dje y pa nan aplica e balornan Olimpico den nan trabou diario cu e atleta. Ta importante pa IOC inclui y constitui e "entourage" den nan programa educativo y di cursonan tocante e balornan Olimpico. IOC mester sigura pa esunnan cu ta asocia na e deporte en general comprende cu e deporte ta mucho mas cu solamente su balor social y entretenimento. E ta un herment importante pa guia hobennan y pa engrandecere y fortalece e spirito di amistad. **IOC Y MOVIMIENTO OLIMPICO** E Movimiento Olimpico ta encera entidadnan di cua e responsabilidad ta bay mas aya cu deporte. Entre nan media y patrocinadonan. Mientras cu e sociedad riba su mes awor ta acepta medionan di comunicacion masivo, specialmente e medionan social, como un forma pa encontra otro, di otro banda tecnologia ta sigui ta responsabel pa

e manera di biba sedentario y ta un contribuyente na obesidad y su crecimiento, como tambe e crecimiento di malesanan "non-comunicable" entre hobennan. E conferencia a nota cu satisfaccion e rol positivo cu social media por hunga como un manera efectivo pa encurasha hobennan pa cuminsa practica deporte y pa keda activo den deporte tambe. **CONFERENCIA** E conferencia tabata masha positivo tocante e cooperacion y colaboracion entre Movimiento Olimpico, Nacionnan Uni y su sistema y e sociedad civil, den nan intento pa combati desaroyonan malo den sociedad y den cumplimiento di e Millennium Development Goals. E union entre e stakeholders ta importante pa deporte por ser uza pa ta e "catalisado" pa respet mutuo, basa riba derecho humano manera e ta para den e Declaracion Universal di Nacionnan Uni riba Derecho Humano y e division nan di UNESCO y di IOC. Deporte mester wordo considera di ta un herment importante pa inclusion social di gruponan margina den sociedad, gruponan cu limitacion fisico y pa logra igualdad di genero, entre otro. □